



Centralna banka
BOSNE I HERCEGOVINE
Централна банка
БОСНЕ И ХЕРЦЕГОВИНЕ



SEDMIČNI PREGLED KRETANJA NA GLOBALNIM FINANSIJSKIM TRŽIŠTIMA

21. 4. 2025. – 25. 4. 2025.

ODJELJENJE ZA BANKARSTVO, SLUŽBA FRONT OFFICE



Sarajevo, 28. 4. 2025. godine

SEDMIČNI PREGLED KRETANJA NA GLOBALNIM FINANSIJSKIM TRŽIŠTIMA **21. 4. 2025. – 25. 4. 2025.**


Tabela 1: Prikaz kretanja prinosa na državne obveznice

Prinosi	Eurozona				SAD				Velika Britanija				Japan			
	18.4.25	-	25.4.25		18.4.25	-	25.4.25		18.4.25	-	25.4.25		18.4.25	-	25.4.25	
2 godine	1,69	-	1,72	↗	3,80	-	3,75	↘	3,92	-	3,86	↘	0,65	-	0,69	↗
5 godina	2,02	-	2,02	→	3,94	-	3,86	↘	4,04	-	3,97	↘	0,85	-	0,91	↗
10 godina	2,47	-	2,47	→	4,32	-	4,24	↘	4,57	-	4,48	↘	1,29	-	1,34	↗

Tabela 2: Prikaz kretanja prinosa na njemačke Bubillove

Dospijeće	Prinosi		
	18.4.25	-	25.4.25
3 mjeseca	1,894	-	1,869 ↘
6 mjeseci	1,856	-	1,844 ↘
1 godina	1,770	-	1,762 ↘

Grafikon 1: Prikaz krivulja prinosa državnih obveznica



Grafikon prikazuje krive prinosa Njemačke (zelena), SAD (plava), Velike Britanije (crvena) i Japana (ljubičasta) za periode od 3 mjeseca do 30 godina na dane 25. 4. 2025. godine (pune linije) i 18. 4. 2025. godine (isprekidane linije). Na donjem dijelu grafikona je prikazana razlika između vrijednosti odgovarajućih prinosa na navedene datume.

MMF je u najnovijem Svjetskom ekonomskom pregledu upozorio na rastuće rizike od recesije u SAD-u jer Trumpov trgovinski rat usporava globalni rast, smanjujući prognoze globalnog ekonomskog rasta za 2025. i 2026. godinu na 2,8%, odnosno 3% sa januarske prognoze od 3,3% za obje godine. Predviđa se da će ekonomski rast SAD-a usporiti na 1,8% u tekućoj godini, uz rizik od recesije od 37%. Trgovinske tenzije i carine su uzrokovale reviziju naniže prognoza rasta za sve zemlje G7 i velike ekonomije, uključujući i Kinu, za čiji rast se sada predviđa da će u 2025. godini iznositi 4%. Očekuju da će inflacija na globalnom nivou opadati sporije, te da će bilježiti nivo od 4,3% u ovoj godini. Istaknuto je da fragmentacija trgovine pokreće neefikasnost, sa srednjoročnom prognozom globalnog ekonomskog rasta ispod 3,2%, što je nivo niži od svih historijskih prosjeka. MMF je pozvao na rješavanje trgovinskih tenzija kako bi se spriječila daljnja šteta, pri čemu je glavni ekonomista Gourinchas naglasio važnost nezavisnosti FED-a kako bi se održao kredibilitet.

EUROZONA

Prinosi obveznica eurozone su u odnosu na prethodnu sedmicu većinom zabilježili blagi rast na prednjem dijelu krive, a blagi pad na srednjem i krajnjem dijelu. Izraženiji pad od 5 do 7 baznih poena je zabilježen kod srednjoročnih i dugoročnih obveznica Francuske i Italije. Finansijska tržišta u Evropi su zbog praznika bila zatvorena u ponedjeljak. Objavljene prognoze profesionalnih prognozera ECB ukazuju na blago veći rast inflacije u ovoj i narednoj godini u odnosu na ranije prognoze. Očekuje se da će inflacija u eurozoni ove godine iznositi 2,2% (ranije 2,1%), u 2026. godini 2,0% (ranije 1,9%), a u 2027. godini 2,0% (nepromijenjeno). Istovremeno su smanjene prognoze rasta BDP-a eurozone za ovu i narednu godinu, te se za tekuću godinu očekuje 0,9% (ranije 1,0%), za 2026. godinu 1,2% (ranije 1,3%), a za 2027. godinu su blago povećane na 1,4% (ranije 1,3%). Prognozirana stopa nezaposlenosti u eurozoni za sve tri posmatrane godine sada iznosi 6,3%, što je bolje u odnosu na prethodne prognoze, kada je očekivano 6,5% u 2025. godini i 6,4% u 2026. godini. Alatka ECB za praćenje plata ukazuje na to da bi u IV kvartalu plate mogle rasti za 1,6% godišnje, što bi predstavljalo snažan pad rasta plata s rekordno visokih 5,3%, koliko je zabilježeno u prošloj godini. Investitori očekuju daljnja smanjenja kamatnih stopa ECB u ovoj godini, djelomično zbog neizvjesnosti oko globalne trgovine i snažnijeg eura, koji bi mogli dozvoliti ECB da još najmanje dva puta smanji kamatne stope do kraja godine. MMF je smanjio prognoze ekonomskog rasta eurozone za ovu godinu na 0,8% s ranije očekivanih 1,0%.

Predsjednica ECB Lagarde je upozorila da bi potpuni trgovinski rat mogao smanjiti ekonomski rast za 0,5%, ali je izrazila optimizam oko postizanja trgovinskog dogovora na relaciji EU-SAD, uprkos izazovnim pregovorima. Lagarde je izjavila i to da bi tarife mogle biti više deflatorne nego inflatorne za Evropu, ali je potvrdila da je „neto uticaj“ još uvijek nejasan. Glavni ekonomista ECB Lane je ponovo naglasio da je malo vjerovatno da će trgovinske tenzije gurnuti eurozonu u recesiju, ali i ukazao na fleksibilnost ECB, navodeći da nije obavezna da po automatizmu vrši prilagođavanja po 25 baznih poena. Veći broj članova UV je tokom protekle sedmice dao slične izjave po pitanju mogućih uticaja tarifa na stopu inflacije i ekonomski rast eurozone, a prema nekima bi to mogli biti otežavajući faktori prilikom donošenja odluke o kamatnim stopama ECB na predstojećoj sjednici u junu, zbog i dalje visokog stepena neizvjesnosti. Član UV ECB Nagel je izjavio da se Njemačka nalazi u opasnosti od recesije u ovoj godini zbog smanjenja rasta usljed američkih tarifa.

Istraživanje ZEW instituta je pokazalo da više od 80% njemačkih kompanija očekuje da će američke tarife naštetiti ekonomiji. Deutsche Bundesbank je objavila da je ekonomija Njemačke u I kvartalu zabilježila blagi rast, ali je upozorila na mogućnost smanjenja rasta u II kvartalu. Dalje je navedeno da, iako je zabilježen oporavak građevinskog sektora s niskih nivoa, industrijska potražnja, kako domaća, tako i strana, i dalje ostaje slaba, pri čemu osnovni trendovi ukazuju na stagnaciju. Inflatorni izgledi su još uvijek neizvjesni, u vrijeme kada EUR aprecira u odnosu na USD i kada se očekuje da će se inflacija u kratkom roku blago smanjiti.

Nakon špekulacija da bi predsjednik Francuske Macron mogao raspustiti Parlament i prijevremeno održati izbore u odnosu na planiranu 2029. godinu, iz njegovog kabineta je izdato saopštenje da tako nešto ne planira da uradi.

Tabela 3: Kretanje ekonomskih indikatora za eurozonu

Red. br.	Ekonomski indikatori	Očekivanje	Stvarno stanje	Prethodni period
1.	Odnos duga i BDP-a – EZ P (G/G) 2024. god.	-	87,4%	87,3%
2.	Indeks povjerenja potrošača – EZ P APR	-15,1	-16,7	-14,5
3.	PMI indeks prerađivačkog sektora – EZ P APR	47,4	48,7	48,6
4.	PMI indeks uslužnog sektora – EZ P APR	50,5	49,7	51,0
5.	PMI kompozitni indeks – EZ P APR	50,2	50,1	50,9
6.	Output građevinskog sektora – EZ (G/G) FEB	-	0,2%	0,1%
7.	Trgovinski bilans – EZ (u milijardama EUR) FEB	15,0	21,0	14,4
8.	Trgovinski bilans – Španija (u milijardama EUR) FEB	-	-3,43	-6,19
9.	Proizvođačke cijene – Finska (G/G) MAR	-	0,5%	0,7%
10.	Proizvođačke cijene – Španija (G/G) MAR	-	4,9%	6,7%
11.	Maloprodaja – Francuska (G/G) MAR	-	-0,8%	-0,1%
12.	Ifo indeks očekivanog povjerenja – Njemačka APR	85,0	87,4	87,7
13.	Stopa nezaposlenosti – Finska MAR	-	10,1%	9,4%

Odricanje od odgovornosti (Disclaimer)

Navedeni pregled kretanja je zasnovan na eksternim izvorima i ne sadrži bilo kakve komentare, procjene i stavove CBBiH. Centralna banka ne može garantovati njihovu tačnost i ne snosi odgovornost za direktnu ili indirektnu štetu koja može nastupiti kao posljedica korištenja ili nemogućnosti korištenja informacija, materijala ili sadržaja, ili za posljedice odluka donesenih na osnovu njih.

SAD

Prinosi američkih državnih obveznica su, na sedmičnom nivou, zabilježili smanjenje duž cijele krive. Početak prošle sedmice je bio obilježen kritikama i pritiscima na predsjednika FED-a Powella od strane predsjednika Trumpa, koji je pozvao na njegovu smjenu i promptno smanjenje kamatnih stopa. S druge strane, Powell je branio nezavisnost FED-a i upozorio da bi Trumpova tarifna politika mogla stvoriti ekonomske šokove bez presedana, te uticati na inflaciju i zapošljavanje. Dok se neki zvaničnici FED-a zalažu za brzo smanjenje kamatnih stopa kako bi se riješio potencijalni gubitak radnih mjesta, drugi su zabrinuti zbog neusklađenih inflatornih očekivanja. FED je pauzirao daljnje rezove, čekajući jasnije signale ublažavanja inflacije, usred globalne neizvjesnosti podstaknute Trumpovom politikom. Već u utorak ton je ublažen, nakon što je predsjednik Trump izjavio da nema namjeru smijeniti predsjednika FED-a Powella, uprkos njegovoj frustraciji zbog toga što centralna banka nije krenula brže sa smanjenjem kamatnih stopa. Predsjednik FED-a iz Filadelfije Harker je istakao kredibilitet FED-a, izgrađen kroz nezavisnost i objektivnost, kao njegovu najveću snagu.

U kontekstu trgovinskih odnosa, predsjednik Trump je izrazio optimizam u pogledu smanjenja carina potencijalnim sporazumom s Kinom, ali je upozorio na oštrije uslove ukoliko pregovori ne uspiju. Međutim, zvaničnici Kine su signalizirali da nisu spremni na pregovore sve dok su na snazi postojeće izuzetno visoke tarife.


Protekle sedmice je objavljen FED-ov izvještaj o stanju u privredi SAD-a, poznatiji kao „Beige Book“, u kojem je istaknuto da je među zvaničnicima preovladavala zabrinutost zbog trgovinskog rata. Navedeno je da se ekonomska aktivnost blago promijenila u odnosu na prethodni izvještaj, te da je neizvjesnost oko međunarodne trgovinske politike i dalje u fokusu.

Prema rezultatima istraživanja Bloomberg-a za april, ekonomski analitičari prognoziraju da će ekonomija SAD-a u tekućoj godini zabilježiti ekspanziju po stopi od 1,4%, dok se za 2026. i 2027. godinu prognoziraju stope od 1,5% i 2,0%, respektivno. Prognozirana stopa inflacije za tekuću godinu je povećana na 3,2% (prethodno prognozirano 3,0%), dok je za narednu godinu povećana na 2,8% s prethodno prognoziranih 2,6%. Većina anketiranih ekonomista očekuje da će FED zadržati referentnu kamatnu stopu na sjednici koja se održava početkom narednog mjeseca, dok vjerovatnoća recesije u narednih 12 mjeseci iznosi 45%.

Tabela 4: Kretanje ekonomskih indikatora za SAD

Red. br.	Ekonomski indikatori	Očekivanje	Stvarno stanje	Prethodni period
1.	PMI indeks prerađivačkog sektora P	APR	49,0	50,7
2.	PMI indeks uslužnog sektora P	APR	52,6	51,4
3.	Broj zahtjeva za hipotekarne kredite	18. apr	-	-12,7%
4.	Inicijalni zahtjevi nezaposlenih za pomoć	19. apr	222.000	222.000
5.	Kontinuirani zahtjevi nezaposlenih za pomoć	12. apr	1.869.000	1.841.000
6.	Vodeći indeks	MAR	-0,5%	-0,7%

Grafikon 2: Kretanje kursa EURUSD tokom protekle sedmice



USD je aprecirao u odnosu na EUR, te je kurs EURUSD zabilježio pad s nivoa od 1,1393 na nivo od 1,1365.

VELIKA BRITANIJA

Finansijsko tržište je u Velikoj Britaniji u ponedjeljak bilo zatvoreno zbog praznika.

Ured za prudencijalnu regulaciju Velike Britanije (PRA) je pauzirao planove za ograničavanje držanja nebritanskih pokrivenih obveznica kao visoko likvidnih zbog pravila u vezi s koeficijentom pokrivenosti. Kreator monetarne politike iz BoE Greene je izjavila da tarife predsjednika Trumpa izazivaju dezinflatorni rizik za Veliku Britaniju jer bi odluka ove zemlje da uvede recipročne tarife mogla privući jeftiniju robu iz Azije i EU, ali je izrazila zabrinutost zbog domaće inflacije podstaknute ograničenim kapacitetom ponude i istakla da je njen stav prema smanjivanju kamatnih stopa i dalje oprezan. MMF je smanjio prognozirani rast Velike Britanije za 2025. godinu na 1,1%, što predstavlja smanjenje za 0,5% u odnosu na prethodnu prognozu, a za 2026. godinu prognoze su smanjene na 1,4% s ranije prognoziranih 1,5%. Ovakvo smanjivanje dešava se usljed Trumpovog tarifnog rata koji razara globalnu ekonomiju, uzrokujući rast troškova pozajmljivanja u Velikoj Britaniji. U izvještaju MMF-a je istaknuto da su slabljenje privatne potrošnje i rast inflacije ključni faktori koji su izazvali smanjivanje prognoza.

Ministrica Reeves je izjavila da je Velika Britanija i dalje zemlja s najbržim ekonomskim rastom u grupi G7, ali se nije osvrnula na usporavanje ekonomskog rasta i na rast inflacije. Smanjenje PMI pokazatelja ukazuje na to da bi ekonomija Velike Britanije mogla zabilježiti kontrakciju u drugom kvartalu. Sva tri ključna PMI pokazatelja se nalaze ispod granične vrijednosti 50, u zoni kontrakcije. Za inflaciju se očekuje da će u sljedećem kvartalu porasti na 3,3%, što je manje od februarske prognoze (3,7%), a ekonomisti očekuju opreznost u tempu smanjivanja kamatnih stopa. BoE je od augusta smanjila kamatne stope za 75 baznih poena, a očekuje se daljnje smanjenje na 3,75% do kraja godine.

Kao rezultat trenutnih trgovinskih pregovora, SAD namjeravaju da smanje tarife za automobilske sektor Velike Britanije s 10% na 2,5%. Guverner BoE Bailey se osvrnuo na uticaj globalnih trgovinskih tenzija i nesigurnosti u vezi s tarifama, naglašavajući efekte koje oni proizvode na poslovno raspoloženje i ponašanje potrošača. Iako je uticaj na devizni kurs u Velikoj Britaniji minimalan, Bailey je upozorio na to da bi eskalacija trgovinskih tenzija mogla nanijeti štetu otvorenim ekonomijama kakva je ekonomija Velike Britanije, te doprinijeti usporavanju ekonomskog rasta. On je, uprkos ovim izazovima, izrazio optimizam u vezi s domaćom ekonomijom, navodeći da su podaci o BDP-u ohrabrujući i odbacujući strah od neizbježne recesije. Signalizirao je mogućnost novog smanjenja referentne kamatne stope BoE za 25 baznih poena na sastanku MPC BoE 8. maja. GfK indeks povjerenja potrošača je smanjen na najnižu vrijednost u posljednjih 17 mjeseci, što povećava strah od smanjenja potrošnje u budućnosti.

Tabela 5: Kretanje ekonomskih indikatora za UK

Red. br.	Ekonomski indikatori	Očekivanje	Stvarno stanje	Prethodni period
1.	Neto pozajmljivanje javnog sektora (u mlrd GBP)	MAR	15,8	16,4
2.	PMI indeks prerađivačkog sektora P	APR	44,0	44,9
3.	PMI indeks uslužnog sektora P	APR	51,5	48,9
4.	PMI kompozitni indeks P	APR	50,4	48,2
5.	CBI indeks poslovnog optimizma	APR	-	-33
6.	GfK indeks povjerenja potrošača	APR	-21	-23
7.	Maloprodaja (G/G)	MAR	1,8%	2,6%

Tokom protekle sedmice GBP je aprecirala u odnosu na EUR, pa je kurs EURGBP zabilježio pad s nivoa od 0,85708 na nivo od 0,85357. GBP je aprecirala i u odnosu na USD, pa je kurs GBPUSD povećan s nivoa od 1,3296 na nivo od 1,3315.

JAPAN

Član MPC BoJ Nakagawa je istakao da je povećana tržišna nesigurnost, te je napomenuo da bi tarife SAD-a mogle smanjiti trgovinu, korporativne profite i sveukupan rast. Iako nije odmah postignuto rješenje, predsjednik SAD-a Trump je najavio „veliki napredak“ u trgovinskim pregovorima s Japanom u vezi s izuzecima od tarifa. Japan nastoji da završi trgovinske pregovore sa SAD-om do samita G7 u junu, kako bi se riješila pitanja tarifa na automobile i poljoprivredu, ali se opire pridruživanju trgovinskom bloku SAD-a protiv Kine. Premijer Japana Ishiba je izjavio da je odlučio kreirati hitan ekonomski paket kako bi pomogao industriji da se izbori s uticajem tarifa SAD-a, te da će mjere biti usmjerene na pružanje podrške malim i srednjim preduzećima koja će biti pogođena tarifama. On također planira da pomogne radnicima u poljoprivredi, šumarstvu i ribolovu. Novčana pomoć domaćinstvima s niskim prihodima će također biti uključena u ovaj paket. Ministar finansija Kato je istakao da diskusije treba da se baziraju na postojećim sporazumima u vezi s valutom, te dodao da valute treba da određuje tržište, a pretjerana pomjeranja mogu imati negativan uticaj na ekonomiju i finansijsku stabilnost.

MMF je smanjio prognoze ekonomskog rasta ekonomije Japana za 2025. godinu na 0,6%, što je pad od 0,5% u odnosu na prognoze iz januara, navodeći uticaj tarifa SAD-a i neizvjesnost ekonomije Japana koja zavisi od izvoza. Iako se očekuje da će lična potrošnja ojačati zbog rasta plata iznad inflacije, tarife poništavaju ove dobitke. MMF je također smanjio prognoze rasta za 2026. godinu na 0,6%, što je pad od 0,2% u odnosu na ranije prognoze. Očekuje se da će BoJ povećati kamatne stope mnogo sporije nego što je prethodno bilo očekivano, postepeno se približavajući neutralnoj stopi od 1,5% u srednjoročnom periodu, kako bi održala inflaciju na ciljanom nivou od 2%. Prema anketi Reutersa, 84% ekonomista očekuje da će BoJ zadržati nepromijenjene kamatne stope do juna, a samo 52% očekuje povećanje u periodu od jula do septembra, što je manje u odnosu na očekivanja iz marta (70%). Nedavno uvedene tarife predsjednika SAD-a Trumpa na robu Japana i automobile su narušile normalizaciju politike BoJ, a 87% ekonomista vjeruje da će Japan izbjeći recesiju.

Tabela 6: Kretanje ekonomskih indikatora za Japan

Red. br.	Ekonomski indikatori		Očekivanje	Stvarno	Prethodni
				stanje	period
1.	PMI kompozitni indeks P	APR	-	51,1	48,9
2.	PMI indeks prerađivačkog sektora P	APR	-	48,5	48,4
3.	PMI indeks uslužnog sektora P	APR	-	52,5	50,0
4.	Indeks aktivnosti uslužnog sektora (M/M)	FEB	0,4%	0,0%	1,4%
5.	Proizvođačke cijene u uslužnom sektoru (G/G)	MAR	3,0%	3,1%	3,2%
6.	Porudžbine mašinskih alata (G/G) F	MAR	-	11,4%	3,5%
7.	Stopa inflacije u Tokiju (G/G)	APR	3,3%	3,5%	2,9%
8.	Prodaje širom zemlje (G/G)	MAR	-	-4,2%	-2,3%

JPY je tokom protekle sedmice deprecirao u odnosu na EUR, te je kurs EURJPY zabilježio povećanje s nivoa od 161,97 na nivo od 163,30. JPY je deprecirao i u odnosu na USD, te je kurs USDJPY zabilježio povećanje s nivoa 142,18 na nivo od 143,67.


NAFTA I ZLATO

Cijena jednog barela sirove nafte na otvaranju tržišta u ponedjeljak je iznosila 64,68 USD (56,98 EUR).

Nakon smanjenja cijene nafte od skoro 2,5% zabilježenog u ponedjeljak, a izazvanog kritikama predsjednika Trumpa usmjerenim prema predsjedniku FED-a, u utorak je cijena ovog energenta zabilježila rast. SAD su u utorak uvele nove sankcije Iranu, dok se nastavljaju razgovori o nuklearnom programu Teherana. Prema podacima koje je objavio API, zalihe sirove nafte u SAD-u su u sedmici zaključno sa 18.4. pale za 4,57 miliona barela, dok su zalihe benzina i destilata također smanjene. U srijedu je cijena nafte zabilježila smanjenje od preko 3% nakon izvještaja Reutersa o tome da Kazahstan daje prioritet nacionalnim interesima u odnosu na interese OPEC+ i da nije u mogućnosti da napravi značajna smanjenja proizvodnje. Kazahstan je odgovorio da radi na pronalaženju „uzajamno prihvatljivih rješenja“. Prema podacima EIA, zalihe sirove nafte u SAD-u su u istom periodu porasle za 244.000 barela na 443,1 milion barela, dok su analitičari očekivali povlačenje od 770.000 barela. U četvrtak je zabilježen blagi rast cijene ovog energenta jer su otporna potražnja za gorivom u SAD i obaveza proizvođača da ograniče rast proizvodnje signalizirali snagu na fizičkom tržištu, uz dugotrajne geopolitičke tenzije koje uključuju Rusiju, Ukrajinu i Iran. Na kraju sedmice cijena nafte se stabilizovala, dok je Kina razmatrala ukidanje carina na uvoz iz SAD-a, uključujući uvoz etana. Međutim, suprotstavljene poruke o trgovinskim pregovorima između te dvije zemlje dodale su neizvjesnosti na tržištu ovog energenta. Članice OPEC+ raspravljaju o ubrzanom povećanju proizvodnje, a potencijalno rješenje rata Rusije i Ukrajine bi moglo donijeti više ruske nafte na tržišta, čime se povećava pritisak na snabdijevanje.

Na zatvaranju tržišta u petak cijena jednog barela sirove nafte je iznosila 63,02 USD (55,45 EUR), što predstavlja pad od 2,57% na sedmičnom nivou.

Graf 3: Kretanje cijene nafte tokom protekle sedmice




Na otvaranju londonske berze metala u ponedjeljak cijena jedne fine unce zlata je iznosila 3.326,85 USD (2.920,08 EUR).

Na početku sedmice cijena zlata je zabilježila novu rekordno visoku vrijednost jer je zabrinutost da bi predsjednik Trump mogao smijeniti predsjednika FED-a pokrenula „bijeg investitora“ iz dionica, obveznica i dolara u aktive sigurnog utočišta poput zlata. Naredni dan je uslijedila blaga korekcija naniže pod uticajem aprecijacije USD. Vijest da je predsjednik Trump odustao od prijetnji da će smijeniti predsjednika FED-a i optimizam oko trgovinskog sporazuma s Kinom su smanjili privlačnost zlata kao aktive sigurnog utočišta. Isti faktori su uticali na nastavak smanjenja cijene ovog plemenitog metala i u srijedu, kada je ona smanjena za oko 2,9%. U četvrtak je cijena zlata zabilježila rast za preko 1%, dok su investitori procjenjivali uticaj trgovinske politike predsjednika Trumpa i trgovinskog rata na kamatne stope. Špekulacije da bi FED mogao smanjiti referentnu kamatnu stopu ranije u odnosu na prethodna očekivanja, kako bi se izbjegao rizik ulaska u recesiju, podržavaju cijenu ovog plemenitog metala. Na kraju sedmice cijena zlata je blago smanjena jer je optimizam u pogledu ublažavanja trgovinskih tenzija između SAD-a i Kine rastao tokom sedmice, nakon što je Kina izuzela neke američke proizvode od carina.

Od početka godine cijena ovog plemenitog metala je povećana za 26%, dok pojedini analitičari predviđaju da će premašiti nivo od 4.000 USD po unci do drugog kvartala 2026. godine, podstaknuta snažnom potražnjom centralnih banaka, koja u prosjeku iznosi 710 tona kvartalno. Međutim, rizici koji ograničavaju rast cijene zlata uključuju potencijalni pad potražnje centralnih banaka ili veće razmjere deeskalacije trgovinskog rata.

Na zatvaranju tržišta u petak cijena jedne fine unce zlata je iznosila 3.319,72 USD (2.921,00 EUR), što predstavlja blagi pad od 0,21% na sedmičnom nivou.

Graf 4: Kretanje cijene zlata tokom protekle sedmice



Odricanje od odgovornosti (Disclaimer)

Navedeni pregled kretanja je zasnovan na eksternim izvorima i ne sadrži bilo kakve komentare, procjene i stavove CBBiH. Centralna banka ne može garantovati njihovu tačnost i ne snosi odgovornost za direktnu ili indirektnu štetu koja može nastupiti kao posljedica korištenja ili nemogućnosti korištenja informacija, materijala ili sadržaja, ili za posljedice odluka donesenih na osnovu njih.